

Evening Dogri News

27th August 2024

1815 hrs

Headlines

1 केन्द्री मंत्री डॉ. जितेन्द्र सिंह होरें विश्वास जाहर कीता ऐ जे भारती जनता पार्टी जम्मू कश्मीर च सब्बै नशिस्तां जित्तग ते सरकार बनाग।

2 किशतवाड़ जिले दिऐं त्रऊं असैंबली सीटें लेई 32एं मेदवारें अपने नामांकन पत्र भरे। रामबन जिले दिऐं दऊं असैंबली हल्के लेई 23एं मेदवारें नामांकन पत्र दाखल कीते। जित्थें 18 सितम्बर 2024 गी पैहले गेड़ तैह्त वोट पाए जाने न।

3 विदेश मंत्री डॉ. एस.जयशंकर होरें ब्राजील दी जी-20 अध्यक्षता गी भारत आस्सेआ पूरा समर्थन देने दा धेइया फही दोहराया।

4 रामबन जिले च बददल फटने करी लापता 7 जनें चा दऊं दियां लोथां बरामद, 5एं लापता लोकें गी तुप्पने लेई मुहिम जारी।



Doda BJP Nomination

पैहला गेड़ तैह्त 18 सितम्बर गी वोट पाए जांगन। अज्ज नामांकन पत्र भरने दा खिरी दिन ऐ। साबका राज्यमंत्री शक्ति राज परिहार ते जी.एस.राणा होर बीजेपी दे मेदवार दे तौर पर बिलतरतीन डोडा पच्छम ते डोडा पूर्व थमां अपना नामांकन भरेआ ऐ। इस मौके पर उंदे कन्नै उंदे समर्थक बी खरी मतह गिनतरी च मजूद हे। इस मौके पर केन्द्रीय मंत्री डॉ. जितेन्द्र सिंह होर बी उंदे कन्नै मजूद हे। इस मौके पर बोलदे होई उनें विश्वास जाहर कीता जे बीजेपी सारी सीटें जित्त हासल करोग।



Kishtwar Nomination

किशतवाड़ जिले दी त्रै विधानसभा सीटें लेई पैहले गेड़ तैह्त मतदान 18 सितम्बर 2024 गी होग। 32 मेदवारें अपना नामांकन इनें हल्के लेई दर्ज करोआया। आकाशवाणी जम्मू संवाददाता दी रिपोर्ट मूजब 11 मेदवारें किशतवाड़ विधानसभा हल्के लेई 13 मेदवारें अपना नामांकन इंद्रवाल हल्के थमां ते जिसलै कि 8 मेदवारें पाङ्डर नागसैनी लेई नामांकन भरेआ। अज्ज नामांकन भरने दी खिरी तरी ऐ। नामांकन पत्रेंदी जांच 29 अगस्त गी कीती जाग। मेदवार जेकर चाह्न तां अपना नामांकन 30 अगस्त तगर वापस परताई सकदे न।

किशतवाड़ जिले च बक्ख-बक्ख सियासी पार्टिएं दे मेदवारें अज्ज डीसी दफ्तर च अपना नामांकन भरेआ। अज्ज पैहले गेछ तैह्त नामांकन भरने दा खिरी दिल हा। बीजेपी दी मेदवार शगुन परिहार होरें अपना नामांकन भरेआ। शगुन परिहार बीजेपी आस्सेआ जारी पैहली सूचि च इकलौती महिला मेदवार न। साबका मंत्री सुनील शर्मा होरें पाङ्डर थमां अपना नामांकन बीजेपी मेदवार दे तौर पर भरेआ। बीजेपी दे मेदवार तारिक हुसैन कीन होरें इंद्रवाल हल्के थमां अपना नामांकन भरेआ। पीडीपी दे मेदवार फिरदोस अहमद टाक होरें किशतवाड़ थमां अपना नामांकन भरेआ। डीडीसी किशतवाड़ पूजा ठाकुर होरें पाङ्डर थमां नेशनल कांफ्रेंस दे मेदवार दे तौर पर अपना नामांकन भरेआ। पीडीपी दे मेदवार शेख नसीर होरें अपना नामांकन इंद्रवाल हल्के थमां भरेआ। एह्दे अलावा होर केई सारे सियासी नेताएं अपने अपने नामांकन भरै।



Ramban Nomination

18 सितम्बर 2024 गी पैहले गेड़ तैहत् मतदान होंदा ऐ। रामबन जिले दे 2 विधानसभा हल्के तैहत् इस गेड़ च मतदान होग। एह्दे आस्तै कुल 23 मेदवारें अपना नामांकन भरेआ ऐ। आकाशवाणी जम्मू संवाददाता दी रिपोर्ट मूजब रामबन विधानसभा हल्के लेई 13 मेदवारें नामांकन भरेआ जिसले कि बनिहाल हल्के लेई 40 मेदवार अपना नामांकन भरेआ। अज्ज नामांकन भरने दी खीरी तरीक ही। नामांकन पत्रें दी जांच आला कम्म 29 अगस्त गी कीता जाग। नामांकन वापस परताने दी खीरी तरीक 30 अगस्त ऐ।

<><><><><><>

SVEEP Mehandi Reasi

स्वीप अभियान दे इक हिस्से दे तौर रियासी च आंगनवाड़ी कार्यकर्ताएं ते कालेज विद्यार्थिं आस्तै मेंहदी प्रतियोगिता दा सरिस्ता कीता गेआ। एह्दा मकसद लोके च जागरूकता पैदा करना हा। इस दरान लोके गी बक्ख-बक्ख नारें जियां आओ वोट करचे ते मुख्य गी अस सशक्त बनाचै राएं जागरूक ते जानकार बनाया गेआ। एह सारा किश रियासी दे जिला चुनां अधिकारी हुंदे मार्गदर्शन हेठ होआ।

<><><><><><>

SVEEP Poonch

स्वीप प्रोग्राम दे इक हिस्से दे तौर पर पुंछ जिले दे कुड़िएं दे सरकारी हाई स्कूल दिगवार मलदेयाला च मतदाताएं गी जागरूक करने लेई बच्चें आस्सेआ रैली कड़डी गई। औंदे विधानसभा चुनाएं गी दिक्खदे होई स्वीप अभियान तैहत् नेकां गतिविधियां चलाइयां जा'रदियां न। एह्दे च खरी मती गिनतरी च स्कूल दे विद्यार्थिं ते अध्यापकें हिस्सा लैता। इस सब्बने मतदाताएं गी अपील कीती जे ओह चुनाएं च बधी चढ़ियै हिस्सा लैन। कार्यक्रम दी सदारत पुंछ हवेली दे नोडल अफसर शाहीन अख्तर होरें कीती।

<><><><><><>

Valmiki Voting

वालमीकी समाज दी जेकर गल्ल करचै तां पिछले 70एं ब'रें च उनेंगी विधानसभा चुनाएं च वोट पाने दा अधिकार नेई ऐ हा। पर दफा 370 दे 35एं दे हटने मगरा पैहली बारी ओह हुन होने आले विधानसभा चुनाएं दरान पोट पार्ई सकगंन। इस गल्ला गी लेइयै ओह बड़े मते खुश न।

<><><><><><>

Helpdesk Migrants

जम्मू कश्मीर च विधानसभा चुनां दियां तैआरियां अपनी रफ्तार फगड़ा'रदियां न। कश्मीरी विस्थापत समुदाय दे योग्य मतदाताएं गी सहायता देने लेई हैल्प डैस्क कायम कीते गे न। एह्दा मकसद विशेष मतदान केन्द्रें पर चुनां प्रक्रिया गी रमानदारी कन्नै करोआना जकीनी बनाना ऐ। मैह्कमे दे अधिकारिं मूजब चुनाएं गी आजाद ते निरपक्ख ढंगै सिर करोआने लेई जतन कीते जा'रदे न। चुनां आयोग नै विस्थापत समुदाय दे लोके लेई 24 विशेष मतदान केन्द्र कायम कीते न। एह विशेष मतदान केन्द्रें जम्मू उधमपुर ते दिल्ली च कायम कीते गे न। चुनां प्रक्रिया गी सुचारू बनाने लेई खरी मती गिनतरी च कर्मचारी तैनात कीते गे न। राहत ते आबादकारी आयुक्त डॉ. अरविंद करवानी होरें आखेआ जे एह हैल्प डैस्क विस्थापतें दी समस्याएं दा हल करा'रदे न। पैहले गेड़ तैहत् चुनां 18 सितम्बर गी होने न। कुल 24 मतदान केन्द्रें चा 19 जम्मू च, इक उधमपुर ते 4 दिल्ली च बनाए गे न।

<><><><><><>

India-Brazil

विदेश मंत्री डॉ. एस.जयशंकर होरें जी-20 अध्यक्षता लेई ब्राजील गी पूरा समर्थन देने दे अपने घेइयै गी फही दोहराया। अज्ज नमीं दिल्ली च 9में भारती-ब्राजील संयुक्त आयोग दी बैठक च अपने शुरूआती ब्यान च डॉ. जयशंकर होरें न्यायपसंगत-निपक्ख दुनिया ते सत्त धरतै लेई ब्राजील दिएं अनोखिएं पैहलकदमिएं दी सराहना कीती। उनें आखेआ सन् 2006 च शुरू कीती गेदी भारत-ब्राजील सामरिक भ्याली, बक्ख-बक्ख खेत्तरें तगर फैली ऐ। डॉ. जयशंकर होरें दस्सेआ जे ब्राजील कन्नै दपक्खी सरबंध हुन रक्षा, अंतरिक्ष, साईबर सुरक्षा, बंज ते पूंजीनिवेश नेह व्यापक क्षेत्रें तोड़ी फैली गेदे न। उनें आखेआ जे भारती संस्कृति, कला ते फलसफे गी ब्राजील आस्सेआ सराटे जाने पर नमीं दिल्ली खुश ऐ। डॉ. जयशंकर ते ब्राजील दे विदेश मंत्री मोयरो वीएरा होरें 9में भारत-ब्राजील संयुक्त आयोग गी सांझे तौर पर सह अध्यक्षता कीती। ब्राजील इसलै जी-20 दी अध्यक्षता करा'रदा ऐ ते जी-20 शिखर सम्मेलन इस ब'रे 18 थमां 19 नवम्बर गी रियो डी जनेरो च लग्गना तैह ऐ। भारत ते ब्राजील व सांझे मुल्खें दी भ्याली आले बहुआयामी सरबंधें दी सांभ ऐ। विदेश मंत्रालय नै दस्सेआ जे विदेश मंत्री विएरा दा भारत दौरा भारत-ब्राजील सामरिक भ्याली गी होर तगड़ा करने दा इक मौका ऐ ते जेहदे नै बक्ख-बक्ख सेक्टरें च दपक्खिया, प्रांतीय ते बहुआयामी साथ सैहयोग दे नमें आयाम सामने आँगन।



Ramban Cloud

कल दपैहरी मगरा रामबन जिले च बददल फटने आले हादसे च जेहडे 7 जनें लापता होए हे, उंदे चा दऊं दियां लोथां बरामद करी लैतियां गेइयां न। इंदे च इक 12एं ब'रे दी बरेसू दा जागत बी ऐ। आकाशवाणी जम्मू दे संवाददाता दी रिपोर्ट मूजब कल दपैहरी रामबन जिले दी राजगढ तैहसील दिएं कूमेत, धरमान ते हल्ला पंचैत च बददल फट्टे जेहदे नै ढंगर ते डाडी नाले च हाड़ आई गोआ। जेहदे करी त्रऊं परोआरें दे 7 लोक लापता होई गे। लगातार होआ करदी बरखा नै तपाश कम्मै च बिघ्न पाया। गड़ग्राम ते सोनसुआ आले घट्टोघट्ट दऊं सरकारी स्कूलें ते किश होर ढांचे गी नुक्सान पुज्जा ऐ। पार्क कीती गेदियां 3 निजी गड्डियां बी हाड़े दे पानी च रुडी गेइयां।



Basohli

संस्कृति मैहकमे दे प्रधान सचिव सुरेश कुमार गुप्ता होरें औंदी 10 थमां 12 अक्टूबर 2024 गी करोआना तैह कीते दे बसोहली उत्सव दिएं व्यापक तैआरिएं दा जायजा लैता। अपने दौरे दरान उनें मकामी प्रशासन ते लोकें दे प्रतिनिधिएं कन्नै गल्लबात कीती। उनें उत्सव दी सफलता लेई लोकें दी शमूलियत दी महत्ता पर लोह पाई।



Op. Sadbhawana Poonch

भारतीय सेना दे आपरेशन सद्भावना तैहत पुंछ दे सरकारी डिग्री कालेज च रेश्म दे कीड़े पालने ते खुपटिए बारे इक हफता भर चलने आली कार्यशाला दा सरिस्ता कीता गेआ। इस कार्यशाला दा मकसद मकामी युवाएं गी सशक्त बनाना ते खित्ते च आजीविका दे मौके उपलब्ध करोआना हा। इस मौके पर बोलदे होई एहदे च माहिर डॉ. रुबिया बुखारी होरें इक लैक्चर दित्ता ते प्रतिभागिएं कन्नै अपने बचार सांझा कीते।



BPRD

केन्द्री गृहमंत्री अमित शाह होरें कल नमीं दिल्ली च पुलस अनुसंधान ते विकास ब्यूरो दे 54में स्थापना दिवस च शिरकत करगंन। इस मौके पर गृहमंत्री डाक्टर आनंद स्वरूप गुप्ता यादगिरी व्याख्यान देंगन जेहदा विशे होग—“नमां आपराधिक कनून नागरिक केन्द्रित सुधार”। इस मौके पर श्री शाह उत्कृष्ट सेवाएं ते टकोह्दिएं सेवाएं लेई राष्ट्रपति मैडल हासल करने आलें गी संबोधत करगंन। इस समारोह् दरान गृह मंत्री नमें आपराधिक कनूनें पर ब्यूरो दे प्रशासन ते भारती पुलस जरनल दे विशेष अंके गी बी जारी करगंन। ब्यूरो, पुलस प्रणाली गी अनुसंधान, शोध ते विकास राएं बेहतर करने आली भेड़ा कम्म करदा ऐ, एहदा लक्ष्य राज्यें ते केन्द्री पुलस संगठनें मझाटै सैहयोग ते तालमेल बधाना ऐ।



Women T-20

बेहतरिन बल्लेबाज हरमनप्रीत कौर संयुक्त अरब अमिरात च औंदी आईसीसी महिला टी-20 विश्व कप 2024 लेई 15 मिनबरी भारती दल दी अगुवाई करगंन। स्मृति मंदाना टीम दियां उप-कप्तान न। टीम च इंदे इलावा विकेट कीपर रिचा घोष, पूजा वस्त्राकर, ऋचा अरुंधति रेड्डी, रेणुका सिंह ठाकुर, दयालन हेमलथा, आशा सोभना, राधा यादव, संजना संजीवन शामिल न। विकेट कीपर-बल्लेबाज यस्तिका भाटिया ते स्पिन हरफनमौला श्रेयंका पाटिल उंदी सेहत गी दिखदे होई टीम च शामिल कीतियां जांगन। प्रतियोगिता दी 9मां खेउड संयुक्त अरब अमिरात च 3 अक्टूबर थमां 20 अक्टूबर तोड़ी दुबई ते शारजाह च खेउडी जाग। भारत, आस्ट्रेलिया, न्यूजीलैंड, पाकिस्तान ते श्रीलंका कन्ने ग्रुप-ए च ऐ।

